

## **MOCIÓN PARA RECLAMAR O MANTEMENTO DOS INFORMATIVOS LOCAIS E O DIARIO CULTURAL DA CRTVG**

A televisión e a radio públicas de Galicia constitúen, un servizo público e un dereito fundamental da poboación do noso país. Así xurdiron, co obxectivo de garantir o acceso a unha información próxima, plural que puxese o foco na realidade galega e contribuíse, entre outras cuestións, a normalizar a lingua propia, promocionar e difundir a cultura galega na defensa da identidade galega.

Porén, a dirección da CRTVG vén de anunciar que serán suprimidas as desconexións locais dos servizos informativos radiofónicos. A pretendida supresión das desconexións informativas locais suporá unha maior centralización informativa e a perda das referencias horarias coas que durante anos contou a poboación.

Por outro lado tamén se suprimirá o Diario Cultural, principal espazo informativo en materia de cultura que leva 28 anos en antena. O programa pasará a se difuminar entre a programación xeralista, os informativos e o entretemento.

Queremos lembrar os principios inspiradores e alcance recollidos na Lei 9/2011 de medios audiovisuais públicos de Galicia.

*Artigo 4. Principios inspiradores e alcance*

*b) A promoción e difusión da cultura e lingua galegas, así como a defensa da identidade de Galicia.*

*d) O reflexo do pluralismo ideolóxico, político, cultural e social de Galicia.*

*j) A garantía da máxima continuidade na prestación do servizo e a plena cobertura do conxunto do territorio.*

Así como a vulneración do obxectivo de servizo público que obriga a Corporación a:

*Artigo 5. Obxecto do servizo público.*

*1. O servizo público de comunicación audiovisual é un servizo esencial de interese económico xeral que ten por obxecto a produción, edición e difusión dun conxunto posible de canles de radio, de televisión e de servizos de información en liña con programacións diversas e equilibradas para todo tipo de público, que cubrirán os distintos xéneros, destinadas a satisfacer as necesidades de información, cultura, educación e entretemento da sociedade, a preservar o pluralismo nos medios de comunicación e a promover o emprego da lingua galega.*

Por iso, solicitamos do Pleno do Concello de Oroso a adopción do seguinte

ACORDO

1. O Concello de Oroso insta á dirección da CRTVG a manter a desconexións locais nos servizos informativos da Radio Galega para contribuír a garantir o dereito fundamental de acceso a unha información próxima para o conxunto da cidadanía galega que debe ser premisa dun servizo público.
2. O Concello de Oroso insta á dirección da CRTVG a manter o Diario Cultural como espazo propio cultural informativo, de debate e reflexión.
3. O Concello de Oroso á dirección da CRTVG e á Xunta de Galicia a garantir e afortalar o carácter de servizo público da radio e televisión públicas, así como a cumprir a Lei 9/2011 de medios audiovisuais públicos garantindo o pluralismo ideolóxico, político, cultural e social do país e mais a difusión e promoción da lingua e a cultura galegas como elementos centrais da identidade propia de Galicia.

Antonio Leira Piñeiro

Voceiro do Grupo Municipal Socialista